

### **ASO LUA, 24 OKETOPA 2023**

*Na tauaofia le Fonotaga a le Palemene i le itula e 9:30 e tusa ai ma Polokalame o Fonotaga a le Palemene 2023/2024.*

Tatalo.

**FOFOGA FETALAI:** Ou te faasilasila atu ua amatalia nei Tualumaga a le Fono Aoaofa Faitulafono.

### **TUSI FAAMAONIA O LE FILIFILIA**

**E TUSA AI** ma aiaiga o le Fuaiupu 84(2) o le Tulafono o Faiga Palota 2019, **o A'u, o TUIMALEALIIFANO VA'ALETOA SUALAUVI II**, Ao o le Malo, ua ou tu'uina atu ai nei le Tusi Faamaonia o le Filifiliina o sui usufono ua taua Suafa iinei e avea ma Sui Usufono o le Palemene mo le Malo Tutoatasi o Samoa, e amata mai i le aso lenei:

- 1. ALE Vena Ale.**
- 2. TUUU Anasii Leota.**
- 3. MAUU Siaosi Puepuemai.**

**TU'UINA ATU** i lo'u nei lima i Vailele i le Aso 18, Setema 2023.

**Sainia: Tuimalealiifano Va'aletoa Sualauvi II**  
**AO O LE MALO**

### **FAATAUTOINA O SUI USUFONO FOU O LE PALEMENE**

**FOFOGA FETALAI:** A o le i afifio mai sui usufono fou o le Palemene i luma o le Laulau mo le Tautoga, ou te valaau atu ina ia outou tutulai a o o'u faitauina le Tulafono Laiti o Amio Tualoa Faa-Palemene.

*Na tutulai sui usufono o le Palemene a o faitauina e le Fofoga Fetalai  
Tulafono Laitiiti o Amio Tualoa Faa-Palemene.*

## **TULAFONO LAITIITI O AMIO TAUALOA FAA-PALEMENE**

### **FAAMATALAGA O FAAMOEMOEGA:**

O le matafaioi patino a sui usufono uma o le Palemene o le tausisia lea o tulaga aupito i sili ona maualuga o uiga tualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae.

O aiaiga autu ua taua ua faamoemoe e tuuina atu ai ni taiala i, ma ni tulaga i sui usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

### **O AIAIGA AUTU:**

(1) **Faamaoni i le atunuu ma ona tagata:**

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) **Faaaloalo i Tulafono:**

E tatau i sui usufono uma ona tausisia tulafono a Samoa ma puipuia aiaiga autu o lo o i totonu o le Faavae.

(3) **Faaaloalo i Tagata uma:**

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le lē faaituau; aemaise le faia o le amiotonu i taimi uma.

(4) **Faatinoga Lelei o Pule:**

E tatau i sui usufono uma ona:

(a) Faatulaga a latou mataupu totino;

(b) Faaoga so o se faamatalaga ma faamatalaga uma na maua mai i o latou tofi faale-Malo; ma

(c) Faatinoina o so o se malosia po o pule na maua mai i o latou Tofi faale-Malo, mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pei o tulaga tau tupe a le sui usufono lava ia, tupe faaletulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le lē auai atu i lena feutagaiga tau pisinisi.

**Manaoga Faapitoa mo Minisita ma Isi Tagata o lo o Umia Tofi faale-Malo:**

O sui usufono uma o lo o umia tofi faa-palemene o so o se ituaiga ua manaomia e usitaia atoatoa aloaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuina atu o se malosi o so o se ituaiga, po o le a lava, e tusa ai i se mataupu o le a maua ai e sui usufono so o se faaopoopoga i ana meatotino po o se faamanuiaga.

**FAASALAGA:**

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.

**FOFOGA FETALAI:** Mo le faatinoina o le Tautoga, ou te valaau atu i le sui usufono ina ia e afio mai i luma o le Laulau mo le faatinoina o lau Tautoga. Tuu lou aao taumatau i luga o le Tusi Paia, ta'u lou suafa ma faitau le Tautoga.

**TAUTOGA O LE LOTO FAAMAONI**

**“O A’U O..... OU TE TAUTO I LE ATUA E ONA LE MALOSI UMA LAVA, O LE A OU FAAMAONI MA TAUAVEINA TONU LE LOTONU FAAMAONI I LE MALO TUTOATASI O SAMOA, MA O LE A OU FAATAUNUINA MA LE TATAU AI MA LE FAAMAONI O’U TIUTE E AVEA AI O SE SUI USUFONO O LE PALEMENE O SAMOA. IA FESOASOANI MAI LE ATUA IA TE A’U.**

*Na faaalua le agaga fiafia o le Maota i le patipati o latou aao i le maea ai o le faatautoina o sui usufono fou.*

**FOFOGA FETALAI:** Faafetai i le Atua ua tatala mai le lagi matagofie mo le tatou Palemene, ae a le atunuu tatalo ma tapuai mai. Sa tatou augani i Lona Suafa ona tatou matuā maua ai lea o le fesoasoani. O le fesoasoani foi e aumai le Agaga Paia lea o Le na faia le lagi ma le lalolagi.

O le a muamua ia ona ou taia Ulusinave ma ou pale Ulumotootua ae tofia Faualo e pei o le faiva leiloa ma faiva lililo o Salemuliaga. Ou te si’i foi lo’u vaa e aga ma ou ulā le muia’a ina ne i sopolagi le malu o le Tapu’itea, a o lele ua tala tafa’ifā le Maota e pei o le Nofoa na solosui ae seei i le malae o Tiafau o le Faautugatagi a Samoa. O lea ua nofoia Sua ma Auoloolo ua tafa’itoa pou o lauga aua le Fonousu a Samoa o le Maota sua aleaga i ai fue faamata’ata’a o faleupolu.

Tulouna le maualuga o le Maota i le afio o lau Afioga i le Taitai o le Malo, lau Afioga i le Tamaitai Palemia, afio lau Afioga i le Sui Palemia ma le Aiga

Kapeneta, ae tainane le siapo faasau o Minisita Lagolago, afio le Sui Taitai o le Itu Agai ma lea Itu o le Maota ma sui usufono uma o le Palemene o Samoa.

Tainane Ofisa Sili o Pulega o Matagaluega ma Faalapotopotoga Tumaoti a le tatou Malo ma Samoa ua potopoto ma ua tatou auai faatasi i lenei taeao.

Ae le mafai ona ou tiu faava'a o tai matamataloloa ae se i afe ane i le tapuaiga mamalu a Le Ao o le Malo ma Lana Masiofo, le Sui Ao ma lona Faletua. Le paia maualuga i Itutino Fefa'afetauagai o Faigamalo, o paia aua Aiga ma latou Tama, Tama ma o latou Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga a le Motusā, aua le afifio o Sua ma le Vaifanua, Fofō ma Aitulagi, Saole ma Saleaamua ma le Launiu na Saelua, le Laau na Amotasi ma Faatui o le Motu, le Faleula Tau Aitu ma le Faleula Tau Tagata, ma upu i le Manuatele, ae matua le tu'u i Fatulēgae'e ma Malotumau i auauna tofofi a le Atua o lo o faatunapaulia i so o se fatafaitaulaga. Ula e ua ula, pale ua pale. Ua tatou toe ulumea fatufala i le alofa ma le agalelei faaaliali o le Tapaau Sili i le Lagi. Ou te ofo alofa atu ma faatalofa atu i le paia o le Maota.

Tau ia o se upu a le Fofoga Fetalai mo sui usufono sa faatautō i lenei taeao, faamalō le finau, faamalō le sailimalo. Ua i luma o le Atua la outou tautoga i lenei taeao, tau ina ia i ai Lana faauuga mana i lo outou valaauina, ia manuia tele lo outou tulai mai i le tauaveina o Nofoa o outou itumalo.

## ISI FAASILASILAGA A LE FOFOGA FETALAI

**FOFOGA FETALAI:** 1. Ua ou taulimaina ma ua faafofoga foi lo tatou Maota nei ma le atunuu i Faasalalauaga o le Faaiuga a le Faamasinoga i le Mataupu e uiga i le Faamalolo le Tumau ai o le sui usufono o le Itumalo Palota o Lepa ma le sui usufono o le Itumalo Palota o Faleata 3.

E i ai foi le talitonuga, o lo o fesiligia pea e le toatele o le atunuu le atoaga o lenei mataupu. Mo le silafia, o lo o i ai lava le avanoa i le Faamasinoga e toe suesue ma iloilo ai se faaiuga ua le o talafeagai i le silasila. Mo le faataitaiga mo le silasila a le Palemene e tusa ai o lana faaiuga ma o lea ua toe tuuina atu ai le Talosaga Toe Iloilo po o le Talosaga Apili i le Faamasinoga o Talosaga, e faamoemoe e iloiloina i le masina fou o Novema 2023. Ma mo le silafia e le Maota, e le o le iuga lea o lenei mataupu. Ae peitai, ua amanaia le Faaiuga a le Faamasinoga mo lenei taimi, ma ua toe mafai ai ona auai ai ia sui usufono e toalua, i le galuega fai a le Palemene.

Ua manino le tulaga o le tausiga o le mamalu o le laasaga ua i ai nei lenei mataupu. Peitai, i le tausiga lava ia o Tulaga Mamalu ma le Aloaia o le Fonousu Tu Maualuga lenei a le atunuu, e le toe tau faamatalaina le tulaga o le lē feāiāa'i o Matafaioi a le Palemene ma le Itutino o le Faamasinoga. Ma o le a silasila toto'a i ai le Palemene mo le agai i le lumanai.

E le mama i le Palemene lana Faaiuga na fai. Ui i lea, o lo o i ai lava le avanoa i le Faamasinoga e toe silasila ai ma feliuliui ai ana faaiuga ina ia ogatasi ma le faamoemoe o le Palemene na fausiaina ma pasiaina le Tulafono Faavae o le Malo Tutoatasi o Samoa.

2. Mo le silafia e le tatou Maota, ua nofoia nei le Nofoaga mo Tagata Lautele e le Aumalaga mai le Palemene o Tasemania, Ausetalia. E pei ona silafia, o le Palemene a Tasemania o le Paaga totino lea a le Palemene o Samoa e tusa o Faiga a le Faalapotopotoga a Palemene o Malo o le Taupulega faapea lo tatou Itulagi.

O lo o taitaia mai le Aumalaga e le Afioga i le Peresetene o le Maota Maualuga a Tasemania, le Susuga Hon Craig Farrel ma le Afioga i le Fofoga Fetalai o le Fono Aoaofaitulafono a Tasemania, le Susuga Hon. Mark Shelton, faapea isi sui usufono o Maota e Lua, o le Failautusi o le Maota Maualuga ma le Aumalaga.

I acknowledge the presence of the delegation from the Parliament of Tasmania who are with us today. His Hon Craig Farrell, President of the Legislative Council, Hon Mark Shelton, Speaker of the House of the Assembly and Honorable Members of both Houses and the Clerk, talofa talofa lava.

The Parliament of Samoa and the Parliament of Tasmania has been in a twinning relationship for over 15 years. Through this relationship Samoa has benefitted greatly not only in capacity building for its Members as well as for the Parliamentary Secretariat staff. Part of this twinning arrangement is the opportunity to learn from each other, not only our Parliamentary procedures but our culture, share experiences of mutual interest which is the purpose of their visit. The delegation were welcomed yesterday with the traditional ava ceremony performed by the Secretariat staff, they were able to meet some of our Women Parliamentarians and Committees and visited the Land and Titles Court.

I hope your visit will be a fruitful learning experience for you but please don't forget to enjoy our beautiful weather, beaches and the hospitality offered by our people and staff.

*Na faaaliala le agaga fiafia o le Maota i le patipati o latou aao i le maea ai o le Saunoaga Faafeiloai a le Fofoga Fetalai mo Sui Usufono mai le Palemene a Tasemania.*

3. Mo le silafia e le Maota, o le aso 30 Aokuso 2023, na tuuina atu ai e a'u nei o le Fofoga Fetalai se Faasilasilaga o Moliaga i lalo o le Faavae o le Malo

Tutoatasi o Samoa ma le Tulafono o Faiga Palota 2019 i le sui usufono mo Sagaga 1, ona o le solia o aiaiga o Tulafono Tumau a le Palemene.

E tusa ai ma le Mataupu 46 o le Faavae o le Malo Tutoatasi o Samoa ma Fuaiupu 141 - 143 o le Tulafono o Faiga Palota 2019, ua i ai mafuaaga ua talitonu ai le Fofoga Fetalai e faapea, ona o le mataupu i le solia o Tulafono Tumau ma le Tulafono o Faiga Palota e faapea, o se avanoa ua tulai mai i le Nofoa o lea itumalo i le Palemene.

Ua maea foi ona faailoa i ai e le Fofoga Fetalai le faavae o mafuaaga o le taunuu i lea tulaga.

O le moliaga e faasaga i le sui usufono ua taua, na faavae e tusa ai ma aiaiga o Mataupu 46(2)(d) o le Faavae ma Fuaiupu 141 & 142 o le Tulafono o Faiga Palota 2019 ma Tulafono Tumau a le Palemene.

O le aso Fono lenei, na faatonuina e le Fofoga Fetalai e tuuina mai ai le Tali a le Afioga i le sui usufono e tusa o le Faasilasilaga na tuuina atu i ai e le Fofoga Fetalai.

Ou te fautuaina le sui usufono, ina ia faailoa mai pe ta'utino, pe na te te'ena le moliaga e faasaga ia te ia.

E ui i aiaiga o le Fuaiupu 142(1) o le Tulafono o Faiga Palota 2019, e amanaia tele e le Fofoga Fetalai ia aia tatau faale-Faavae a le sui usufono, ma ua ou manatu ai, e ao ona faatino pea le laasaga lea i totonu o le Maota ma saunoa sa'o mai ai le sui usufono o lo o aafia a o faafofoga manino le tatou Palemene.

Ona o lea, ou te tuuina atu ai le avanoa i le Afioga i le sui usufono mamalu, e tulai mai ai ma faailoa mai, pe na te talia le moliaga, pe te'ena foi.

Ou te talosaga atu i lau Afioga i le sui usufono mamalu, e le o se avanoa mo sau saunoaga faaumiumi. E pau lava le mea o lo o moomia, ina ia faaleo lou finagalo e te tautino e te talia pe teena le moliaga e faasaga i lau Afioga i le sui usufono mamalu.

Ou te tapa ma le agaga faaaloalo lau Afioga i le sui usufono mo Sagaga 1 e te tulai mai.

**Afioga Hon LOAU SOLAMALEMALO KENETI SIO (Sagaga 1):** Ae le i faia se tala, e muamua lava ona momoli atu le agaga faafetai i lau Afioga i le Fofoga Fetalai ua maua foi se avanoa e faaleo ai se lagona e tusa ai foi ma le faaaliga a lau Afioga i lenei taeao ua manino foi auofala e tusa ai ma le faaaliga malamalama a lau Afioga.

Atonu foi ua taua lenei avanoa e faatalofa atu ai foi i le paia o le tatou Palemene i ona tulaga faalupe, i le afio o lau Afioga i le Tamaitai Palemia ma le Kapeneta i lena Itu o le Maota i le tala na atoa i le afifio foi o Sui Minisita, a o faavailolo foi le paia o le tapuaiga a Ofisa Sili o Pulega o Matagaluega o le tatou Malo, aemaise o Faalapotopotoga Tumaoti o le tatou Malo o lo o tapuaia faiva i lenei taeao.

Ua malumaunu foi le tiasa i lenei itu i le afio atu o le Afioga i le Sui Taitai aemaise o le paia lasilasi o sui usufono o lo o agaia le Malo. Ia o lo o tatou faatasi foi, tulou, ia ma tatou malo faaaloologia i lenei taeao ua malumaunu ai le tiasa i Tiafau nei, ia aemaise o le loaloa o le tatou atunuu ua potopoto i Tupu ma E'e aua le usoga a Tumua ma Pule, Ituaui ma Alataua, Aiga i le Tai ma le Vaa o Fonoti ua potopoto i Tiafau nei aua foi le Fonousu a si o tatou Atunuu i lenei foi masina.

E ui o lea, ia ua manino auofala i lau faaaliga malamalama lau Afioga i le Fofoga Fetalai i le mataupu foi e pei ona ta'ua ai le sui usufono o Sagaga 1 ona o se tulaga ua faapea ua le usitaia ai Tulafono Tumau o le Maota aemaise foi o le Tulafono Faavae o le tatou Malo. E ui o lea, ia lau afioga e malamalama lava le tulaga foi pei ona ta feiloai ai ma ou oo atu, maua le tusi ma aumai ai foi la'u faaaliga. Ia ae taua ia te au lou finagalo e pei ona faaaliga ma ou savalivali mai ta talatalanoa, ia avatū, aumaī foi sou finagalo. E ui o lea ia o lea ua o'o mai lenei taeao e foliga mai e le o faamalieina lou finagalo i se tali foi na tuuina atu e lou nei foi sui usufono e tusa ai foi ma lou le auai i le fonotaga a le Palemene i na foi masina ua tuana'i. Ona manatu lea ia e le faaumi naua se faamatalaga atonu e maua se avanoa i se isi taimi ia ae ou te manatu lau Afioga o lena ua uma ona tuuina le tali tusitusia foi ma ou faaaliga manino ai le auala na ala ai ona faapena ona le auai i le fonotaga.

Ae a faapea o lou finagalo lea ua faaali nei, faafetai atu i lau Afioga. E leai, o le agaga moni lava, e fai foi o le agaga e fetuunai o muniao i le tatou va nonofo ai, o tatou nei o Matai, o le Maota lenei o Matai. A faapea ua le o lea, ia ua faia lou finagalo ona o le Tulafono ina ia faapena ona usitaia i le agaga o lo o e tausi le Tulafono aua le Palemene ma le faafofogaaga a Samoa, ia o le a faia o lea. Ae ou te manatu, i so'u manatu e eseese ai o ta lagona lau Afioga i le Fofoga Fetalai ma se vaivai o lou nei foi sui usufono, ia ona ou manatu ai lea, ou te le taliaina pei ona tuuina mai lau folasaga i lenei taeao, ona e iai foi le agaga ia te au o lea lava sa ou uia auala e tusa ai ma le Tulafono Tumau i lo'u toesea ai. Ia ae a faapea o se isi tulaga, ia o lena e iina le uta a le faimea i lau Afioga aua foi le tatou va nonofo ai. Faafetai tele foi. Ua uma foi ona e fautua mai ia te au i nisi o tulaga, ia ma fuafuaga foi aua le agai i luma. Ae ua ou manatu ou te faaoololoma'au atu ma ou asuasua atu vaimalu i puega i lou finagalo. A faapea foi ua i ai se agaga foi pe lape foi le auaunaga i se isi o tulaga ona o le lē faanoi atu i lau Afioga, ia aua ia ne i te i ua manatu lau Afioga ai e manatu mama le sui usufono i lo tatou va nonofo ai aemaise o Tulafono Tuamu o le Maota.

E i ai foi le agaga i lenei itula foi o le aso e faamalulu atu foi i le paia o le Palemene i ona tulaga faalupe i lena itu i lau Afioga i le Tamaitai Palemia ma le... i se aga foi ma se tu ua le tautamalii i lau silasila lau Afioga i le Fofoga

Fetalai, ia faapena ona ola i fale le laau a le tamaitai pei o lea upu, a o le agaga moni ia faapena ona mapo le Tulafono a si o tatou Atunuu i ou aao, a o sou vaivai foi e pei ona taumafai atu. Agalelei le Atua i lenei aso aua le fonotaga ma le fonousu a si o tatou Atunuu, ola le auauna ma le agaga faaaloalo.

**FOFOGA FETALAI:** Malo faafetai i le saunoaga a lau Afioga. Ua faafofoga manino le tatou Maota i le saunoaga a le sui usufono ia ma ua manino ai foi lea mataupu.

E tusa ai o tatou Tulafono Tumau e leai se felafolafoaiga e faia i lenei mataupu.

## SAUNOAGA O MALIU

*Na faasilasila e le Fofoga Fetalai i le mamalu o le Palemene le tuumalo o le Afioga ia LAFAlTELE Patrick Leiatuaalesa i le aso 8 Aokuso 2023.*

O le Afioga LAFAlTELE Patrick Leiatuaalesa, e lua (2) Paeaiga sosoo a le Palemene na avea ai ma Sui Usufono o le Palemene.

Na uluai filifilia e avea ma sui usufono o le Palemene i le Paeaiga Lona XIV mo le Itumalo Faaalaalafaga o Alataua i Sisifo mai le tausaga 2006–2011.

Na toe filifilia mai e lona Itumalo i le Paeaiga XV a le Palemene mai le tausaga 2011–2016.

Sa tofia ma filifilia o ia i nisi o Komiti Filifilia a le Palemene mai le :-

1. Tausaga 2006-2011, sa avea ai o ia ma Sui Taitaifono o le Komiti o Mataupu Tau Aoga, Saienisi, Fesootaiga ma Faamatalaga Tekonolosi.
2. Tausaga 2006-2008, sa avea ai o ia ma sui usufono o le Komiti o Mataupu Tau Faiga Palota.
3. Tausaga 2011-2016, sa avea ai ma sui usufono o le Komiti o Mataupu Tau Faamasinoga, Leoleo, Falepuipui ma Faamasinoga o Fanua ma Suafa.

Sa tofia foi e avea ma:

1. Minisita Lagolago o le Matagaluega o Leoleo ma Falepuipui mai le tausaga 2006-2011; ma le
2. Minisita Lagolago o le Matagaluega o Tupe Maua, mai le tausaga 2011-2016.

O ia o se Sui o le Vaega Faaupufai e Puipuia Aia Tatau a Tagata le HRPP.



E avea ai lenei avanoa e fai ai au ma sui o le Palemene e molimoli atu ai faamafanafanaga ma faamaisega i le Faletua ma le Nofo-a-alo aemaise o aiga ma le Itumalo, ona o le sa pelē ua toesea ona o le valaau a le maliu ma le oti.

E tusa o aga masani a le tatou Maota nei, ou te valaau atu ai ma le agaga maualalo i le mamalu o le Palemene, ina ia tatou tutulai faatasi ma le filemu mo se minute e tasi, e faailoa ai lo tatou faaaloalo i le sui usufono ua fai i lagi le folauga.

*Na tutulai filemu le Maota mo le minute e tasi e faaalua ai lo latou faaaloalo i le sui usufono ua tuumalo.*

### **TUUINA ATU O PEPA**

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2023/2024 Nu.39, Lipoti Faaletausaga a le Ofisa o le Loia Sili mo le Tausaga Faaletupe 2021/2022;
2. P.P.2023/2024 Nu.40, Lipoti Faaletausaga a le Ofisa o le Komisi o Faiga Palota mo le Tausaga Faaletupe 2021/2022;
3. P.P.2023/2024 Nu.41, Lipoti Faaletausaga a le Matagaluega o Tiute ma Tupe Maua mo le Tausaga Faaletupe 2021/2022;
4. P.P.2023/2024 Nu.42, Lipoti o le Faiga Palota Laititi mo le Itumalo o Vaimauga 3, 2023;
5. P.P.2023/2024 Nu.43, Lipoti Faaletausaga a le Matagaluega o Tupe mo le Tausaga Faaletupe 2020/2021;
6. P.P.2023/2024 Nu.44, Faamatalaga o Tupe a le Malo mo le Tausaga Faaletupe 2020/2021;
7. P.P.2023/2024 Nu.45, Lipoti Faaletausaga a le Pulega o Faailoga ma Tusipasi Taualoa a Samoa mo le Tausaga Faaletupe 2021/2022;
8. P.P.2023/2024 Nu.46, Lipoti Faaletausaga a le Matagaluega o le Soifua Maloloina mo le Tausaga Faaletupe 2021/2022;
9. P.P.2023/2024 Nu.47, Lipoti Faaletausaga a le Faalapotopotoga o Mea Tau Fale a Samoa mo le Tausaga Faaletupe 2021/2022;
10. P.P.2023/2024 Nu.48, Lipoti Faaletausaga a le Ofisa Tausi Mavaega mo le Tausaga Faaletupe 2021/2022.

Ma le faaaloalo lau Afioga.

### **TUUINA ATU O LIPOTI A KOMITI FAAPALEMENE**

*Na tolaulauina e le Failautusi i le Fono Aoao le faasologa o Lipoti a Komiti Faa-Palemene e tusa ai ma T.T.52(5).*

1. P.P.2023/2024 Nu.49, Lipoti a le Komiti o Tulafono umau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.37, Lipoti a le Komiti Suesue o le Faiga Palota 2021, Fepuari 2023;
2. P.P.2023/2024 Nu.50, Lipoti a le Komiti o Tupe Maua ma Tupe Totogi i le P.P. 2023/2024 Nu.10, Lipoti Faaletausaga a le Matagaluega o Faalapotopotoga a le Malo mo le Tausaga Faaletupe 2021/2022;
3. P.P.2023/2024 Nu.51, Lipoti a le Komiti o le Vaega Tau le Va Fealoa'i i le P.P.2023/2024, Nu 11, Lipoti Faaletausaga a le Matagaluega o Tinā ma Tamaitai, Atina'e o Nuu ma Afioga ma Agafesootai mo le Tausaga Faaletupe 2021/2022;
4. P.P.2023/2024 Nu.52, Lipoti a le Komiti o le Vaega Tau le Va Fealoa'i i le P.P. 2023/2024, Nu.26 & P.P.2023/2024, Nu 27, Lipoti Faaletausaga a le Pulega o Fale ma Malae Taalo o Samoa mo Tausaga Faaletupe 2020/2021 & 2021/2022;
5. P.P.2023/2024 Nu.54, Lipoti a le Komiti o le Vaega Tau le Va Fealoa'i i le Tulafono Tau Faaofi o Teuteuga o le Tulafono o Tau mo Faalavelave Faafuase'i 2023;
6. P.P.2023/2024 Nu.55, Lipoti a le Komiti o le Vaega Tau le Tamaoaiga i le P.P.2023/2024, Nu.15, Lipoti Faaletausaga a le Faalapotopotoga o Eleele Tumaoti o Samoa mo le Tausaga Faaletupe 2021/2022;
7. P.P.2023/2024 Nu.56, Lipoti a le Komiti o le Vaega Tau le Tamaoaiga i le P.P.2023/2024, Nu.17, Lipoti Faaletausaga a le Ofisa o Fuainumera Faamauina mo le Tausaga Faaletupe 2021/2022;
8. P.P.2023/2024 Nu.57, Lipoti a le Komiti o le Vaega o Atinae Eeseese i le P.P.2022/2023, Nu.164, Lipoti Faaletausaga a le Matagaluega o Galuega, Felauaiga ma Atinae Eeseese mo le Tausaga Faaletupe 2021/2022;
9. P.P.2023/2024 Nu.58, Lipoti a le Komiti o le Vaega o Atinae Eeseese i le P.P.2022/2023, Nu.170, Lipoti Faaletausaga a le Pulega o Taulaga a Samoa mo le Tausaga Faaletupe 2021/2022;
10. P.P.2023/2024 Nu.59, Lipoti a le Komiti o le Vaega o Atinae Eeseese i le P.P.2023/2024, Nu.13, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe 2021/2022;
11. P.P.2023/2024 Nu.60, Lipoti a le Komiti o le Vaega o Atinae Eeseese i le P.P.2023/2024, Nu.14, Lipoti Faaletausaga a le Faalapotopotoga o Vaa o Samoa 2021/2022.

Ma le faaloalo lau Afioga.

### **LAFO A LE KOMISI FAA-PALEMENE**

**FOFOGA FETALAI:** Ou te tapa lau Afioga i le Sui Fofoga Fetalai ma o le Sui Taitaifono foi lea o le Komisi Faa-Palemene mo le lafo.

**Afioga AUUAPAAU MULIPOLA ALOITAFUA MULIPOLA (Sui Taitaifono o le Komisi Faa-Palemene):** Lau Afioga i le Fofoga Fetalai, e tusa ai ma Tulafono Tumau 170(2)(a)(b) ma le (c), ou te tolaulauina Suafa o sui usufono e pei ona fautuaina e le Komisi Faa-Palemene mo le faamaonia e le Fono Aoaio Faitulafono i Komiti Faa-Palemene ua tofia iai i le mae'a ai o Faiga Palota Laiti faapea tofiga i Minisita o le Kapeneta.

**1. Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae ua tofia i ai le:-**

(i) *Afioga ia Hon. LAUTAFI Fio Selafi Purcell e suitulaga i le Tofa ALE Vena Ale.*

**2. Komiti o Tupe Maua ma Tupe Totogi ua tofia i ai le:-**

(i). *Susuga Hon TUILAIPA Fatialofa Auelua Sailele Malielegaoi, e suitulaga i le Afioga ia Aiono Tile Gafa.*

(ii). *Tofa LEALAIPEPULE Rimoni Aiafi e suitulaga i le Afioga ALAIASA Moefaauouo Malagaitutogiai Sepulona Moananu.*

(iii). *Tofa Hon TUUU Anasii Leota e suitulaga i le Afioga LAUTIMUIA Uelese Vaai.*

**3. Komiti o le Vaega Tau le Va Fealoai ua tofia i ai le:**

(i). *Tofa ALE Vena Ale e suitulaga i le Afioga LAUMATIAMANU Ringo M. Purcell.*

(ii). *Afioga ALAIASA Moefaauouo Malagaitutogiai Sepulona Moananu e suitulaga i le avanoa sa i ai le Tofa MAUU Siaso Puepuemai a o le i faagasolo Palota Laiti e pei sa faatino talu ai nei ma le:*

(iii). *Tofa MAUU Siaso Puepuemai e suitulaga i le Afioga LAUTIMUIA Uelese Vaai.*

**4. Komiti o le Vaega Tau le Tamaoiga ua tofia i ai le:**

(i). *Afioga Aiono Tile Gafa e suitulaga i le avanoa sa i ai le Tofa Hon. TUUU Anasii Leota, a o le i faagasolo Palota Laiti e pei ona sa faatino talu ai.*

O le lafo lea lau Afioga ma le faaaloalo.

*Faaluaina e le sui usufono mo Vaisigano 1 ma le sui usufono mo Gagaifomauga 2.*

*Na faamaonia le lafo.*

## LAFO A TAITAIFONO O KOMITI FAA-PALEMENE

**FOFOGA FETALAI:** Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

**Afioga AUUPAAU MULIPOLA ALOITAFUA MULIPOLA:** Lau Afioga i le Fofoga Fetalai, talu ai e le i maea lelei iloiloga a lenei Komiti i galuega o lo o taua, o le ala lea o le tulai atu ma le faaaloalo e faatu le Lafo, *Ina ia tusa ai ma Tulafono Tuma 166(2), e talosagaina se faatagaga a le Fono Aoao Faitulafono mo se taimi faaopoopo e faamaea ai iloiloga a lenei Komiti ma toe lipoti mai i le Fono Aoao i le fonotaga ia Tesema 2023.*

1. P.P. 2022/2023, Nu 57, Lipoti o Galuega a le Ofisa Suetusi a Samoa mo le Tausaga Faaletupe 2019/2020;
2. P.P. 2022/2023, Nu.59, Lipoti a le Ofisa o Suetusi a Samoa, Suega o Galuega Faatino i le Tapenaga a Samoa mo le Faatinoina o Sini Taiala ma Atinae Faaauau, Anagata ma Gafataulima 2022;
3. P.P. 2022/2023, Nu. 64, Lipoti a le Ofisa o le Suetusi Sili Aoao i Luga o Tulaga Faaletonu mo le Tausaga Faaletupe 2019/2020;
4. P.P. 2022/2023, Nu.133, Lipoti i Luga o Tulaga Faaletonu mo le Tausaga Faaletupe 2020/2021, Ofisa Suetusi a Samoa;
5. P.P. 2023/2024 Nu.12, Lipoti Faaletausaga a le Komisi o Galuega a le Malo 2021/2022;
6. P.P. 2023/2024 Nu.16, Lipoti Faaletausaga a le Matagaluega o le Palemia ma le Kapeneta 2021/2022.

Ma le faaaloalo tele lau afioga.

*Faaluaina e le sui usufono mamalu mo Gagaiformauga 2 ma le sui usufono mamalu mo Vaisigano Nu.1.*

*Na faamaonia le lafo.*

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga FALEOMAVEGA TITIMAEA TAFUA (Taitaifono, Komiti o Tupe Maua ma Tupe Totogi):** Lau Afioga i le Fofoga Fetalai, talu ai e le i maea lelei iloiloga a lenei Komiti i le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2023, o le ala lea o le tulai atu ma le faaaloalo e faatu le lafo, *Ina ia tusa ai ma aiaiga o le Tulafono Tumau 166(2), e talosagaina se faatagaga a le Fono Aoao Faitulafono mo se taimi faaopoopo e faamaea ai iloiloga a lenei Komiti ma toe lipoti mai ai i le Fono Aoao i le fonotaga ia Tesema 2023.*

*Faaluaina e le sui usufono mamalu mo Lefaga ma Faleaseela ma le sui usufono o Faasaleleaga 2.*

*Na faamaonia le lafo.*

**FOFOGA FETALAI:** Tulai mai lau Afioga i le Taitaifono o le Komiti o le Vaega Tau le Tamaoaiga.

**Afioga NIUAVA ETI L. MALOLO (Taitaifono, Komiti o le Vaega Tau le Tamaoaiga):** E faatalofa i lau Afioga i le Fofoga Fetalai ma Samoa ua potopoto.

Lau Afioga i le Fofoga Fetalai, talu ai e le i maea lelei iloiloga a lenei Komiti i nisi o galuega na tuuina mai mo le iloiloa, ou te tulai atu ai ma le faaaloalo e faatu le lafo, *Ina ia tusa ai ma Tulafono Tumau 166(2), e talosagaina se faatagaga a le Fono Aoao Faitulafono mo se taimi faaopoopo e faamaea ai iloiloga a lenei Komiti i Galuega ua taua i lalo ma toe lipoti mai ai i le Fono Aoao i le fonotaga ia Tesema 2023.*

1. Tulafono Tau Faaofi o le Pepa Faamaonia Faatekonolosi e Iloagofie ai Tagata Samoa 2023;
2. P.P. 2023/2024 Nu.38, Lipoti Faaletausaga a le Pulega o Tagata Tafafao Maimoa Mai mo le Tausaga Faaletupe 2021/2022.

O le lafo lea lau Afioga i le Fofoga Fetalai. Ma lou faaaloalo tele.

*Faaluaina e le sui usufono mai Salega 1 ma le sui usufono mai Faasaleleaga 2, ma le sui usufono mo Falealili 2.*

*Na faamaonia le lafo.*

**FOFOGA FETALAI:** Tulai mai lau Afioga i le Taitaifono o le Komiti o le Vaega o Atinae Eseese.

**Afioga FEPULEAI FAASAVALU FAIMATA SU'A (Taitaifono, Komiti o le Vaega o Atinae Eseese):** Lau Afioga i le Fofoga Fetalai, talu ai e le i maea lelei iloiloga a lenei Komiti i nisi o galuega ua tuuina mai mo le iloiloga, ou te tulai atu ai ma le faaaloalo e faatu le lafo, *Ina ia tusa ai ma Tulafono Tumau 166(2), e talosagaina se faatanaga a le Fono Aoao Faitulafono mo se taimi faaopoopo e faamaea ai iloiloga a lenei Komiti i Galuega ua taua i lalo ma toe lipoti mai i le Fono Aoao ia Tesema.2023.*

1. P.P. 2022/2023 Nu.141, Lipoti Faaletausaga a le Matagaluega o Fesootaiga ma Faamatalga Tekonolosi mo le Tausaga Faaletupe 2021/2022;
2. P.P. 2022/2023, Nu162, Lipoti Faaletausaga a le Auaunaga o Vaa a Samoa mo le Tausaga Faaletupe 2021/2022;

3. P.P. 2022/2023, Nu.163, Lipoti Faaletausaga a le Pulega o Felauaiga i le Laueleele 2021/2022;
4. P.P. 2022/2023, Nu.165, Lipoti Faaletausaga a le Pulega o le Suavai a Samoa mo le Tausaga Faaletupe 2021/2022.

*Faaluaina e le sui usufono mo Lefaga ma Faleaseela, sui usufono mo Vaisigano 1 ma le sui usufono mo Aana Alofi 1.*

*Na faamaonia le lafo.*

## **TULAFONO TAU FAAOFI O TEUTEUGA O LE TULAFONO O TAU MO FAALAVELAVE FAAFUASEI 2023 - iloiloga auiliili**

**FOFOGA FETALAI:** Mo le silafia e le Palemene, o le Tulafono Tau Faaofi lenei sa faia lona faitauga faalua i le aso 14 Iuni 2023.

E tusa ai ma Tulafono Tumau 107(1), e ao ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea mo le iloiloga auiliili.

Ou te tapa lau Afioga i le Sui Taitaifono o le Komiti o le Vaega Tau le Va Fealoai.

**Tofa LENATAI VICTOR FAAFOI TAMAPUA (Sui Taitaifono, Komiti o le Vaega Tau le Va Fealoai):** Ia faamalo faafetai i lau Afioga i le Fofoga o le Maota. E muamua ona ou piiama i le viiga ma le faafetai i le Atua e pei ona alausu ai foi lau Susuga foi i le A'oa'o Fesoasoani po o lau Afioga foi i le Fofoga o le Maota.

Ae ou te faanoi atu ma le faaaloalo i lau Afioga i le Fofoga Fetalai ae ou te le i alulua e fia faamauina le faamalo ma le faafetai i nisi o sui o le matou Komiti o lea ua i ai tofiga fou e pei ona i ai lē sa fai ma o matou Taitaifono a o lea ua avea nei ma Minisita o Taaloga le Afioga ia Laumatiamanu Ringo Purcell. Ia tainane foi le sui usufono mamalu sa matou galulue faatasi foi i le matou Komiti nei a o lea ua avea ma Minisita o Tupe le Afioga ia Lautimuia Uelese Vaai. Faamalo faafetai. O le tatalo ia agalelei le Atua i le lua valaauina aua se manuia mo Samoa.

E fia fiamauina foi le faafetai a le Komiti i le Tamaitai Pule o le Faalapotopotoga aeamaise le latou Ofisa faapea foi le Tamaitai Loia Sili ma le latou foi Ofisa i le lagolagosua a o feagai foi le Komiti ma le latou galuega. Faamalo faafetai.

Ia agalelei foi le Atua i sui usufono fou e pei ona faatautoina i lenei taeao ia faamanuia le Atua i le tou toe tulai mai. Faamalo faafetai.

Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Tau mo Faalavelave Faafuasei 2023, e aunoa ma se Teuteuga.*

*Faaluaina e le sui usufono mamalu mai Aana Alofi 3 ma le sui usufono mamalu mo Aana Alofi 1.*

*Na faamaonia le Lipoti.*

**FOFOGA FETALAI:** E faasilasila atu ua faamaonia nei le Lipoti a le Komiti i le Tulafono Tau Faaofi ma o le a sagai atu loa le Fono Aoa mo le iloiloga auiliili.

E tusa ai ma Tulafono Tumau 104, e amata le iloiloga auiliili i le Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 48.**

*Faamaonia.*

**FUAIUPU 4: Ua faaofiina le Vaega 7A fou.**

*Faamaonia.*

**FUAIUPU 5: Ua teuteuina le fuaiupu 73.**

*Faamaonia.*

**FUAIUPU 1 MA LE IGOA**

**FUAIUPU 1: Igoa Puupuu ma le amataga.**

**IGOA: Tulafono o Teuteuga o le Tulafono o Taii mo Faalavelave Faafuasei 2023.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Taii mo Faalavelave Faafuasei 2023 e aunoa ma se Teuteuga.*

## LAFO MO LE FAATAATIAESE O TULAFONO TUMAU 108(4)

**FOFOGA FETALAI:** Ou te tapa lau Afioga i le Sui Palemia mo le Lafo.

**Afioga Hon TUALA TEVAGA IOSEFO PONIFASIO (Sui Palemia):** Lau Afioga i le Fofoga Fetalai ou te faatu le lafo, *Ina ia faataatiaese Tulafono Tumau 108(4) ina ia avanoa ai le faitauga faatolu o le Tulafono Tau Faaofi sa iloilo ina auiliili i le aso Fono lenei.*

Ma le faaaloalo lava.

*Faaluaina e le Minisita mo Faatoaga ma Faiga Faiva.*

*Na faamaonia le lafo.*

## TULAFONO TAU FAAOFI O TEUTEUGA O LE TULAFONO O TAU MO FAALAVELAVE FAAFUASEI 2023 – faitauga faatolu

**FOFOGA FETALAI:** Ou te tapa lau Afioga i le Minisita o le Faalapotopotoga o Tau mo Faalavelave Faafuasei, Hon Leatinuu Wayne Soialo.

**Afioga Hon LEATINUU WAYNE SOOIALO (Minisita mo le Faalapotopotoga o Tau mo Faalavelave Faafuasei):** E muamua ona momoli le faafetai tele i lau Afioga i le Fofoga Fetalai i lenei taeao. Ia e viia lava le Atua i Lona agalelei, o lea ua mafai ona tatou taunuu i lenei taeao i le manuia soifua.

O lenei itula o le a avea ai foi lou leo e momoli atu le faafetai tele i lau Afioga i le Taitaifono o le Komiti sa iloilo ina lenei Tulafono aemaise foi le Komiti Faa-Palemene o i latou na maua ni manatu aua lenei Tulafono, o le Tulafono e aupito sili ona taua mo le atunuu.

E momoli atu foi le faafetai tele i le Afioga i le Tamaitai Pule o le Matagaluega o le ACC po o i latou o lo o faatinoina le tulaga. Faafetai lava mo le agaga malamalama ua mafai ai ona faataatia mai lenei Tulafono i totonu o le Palemene, aua lava se manuia o nai a tatou tama taaalo, aemaise foi o i latou o lo o aafia le soifua i mea tau taaloga.

Lau Afioga i le Fofoga Fetalai, ou te faatu le lafo, *Ina ia faitauina nei lenei Tulafono Tau Faaofi o Teuteuga o le Tulafono o Tau mo Faalavelave 2023 i lona faitauga faatolu.*

*Faaluaina e le Minisita mo Galuega, Felauaiga ma Atinae Eeseese ma le Minisita o le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa Faifulafono.*



## **ILOILOGA O LIPOTI A KOMITI FAA-PALEMENE**

**P.P.2023/2024 NU.49, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2023/2024 NU.37, LIPOTI A LE KOMISI SUESUE O FAIGA PALOTA 2021, FEPUARI 2023 - ILOILOGA**

**FOFOGA FETALAI:** Ua faafofoga manino lo tatou Maota i le taeao nei i le taimi o le tuuina atu o Lipoti a Komiti Faa-Palemene ua faataatia mai ai ma le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.37, Lipoti a le Komisi Suesue o le Faiga Palota 2021, Fepuari 2023.

Mo le silafia e le mamalu o le Palemene, o le aso 30 Iuni 2023 na faasee atu ai le Lipoti lenei a le Komisi Suesue o le Faiga Palota 2021 i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloaina, ma toe lipoti mai ai i le Fono Aoa.

E talu ai o le taua tele o lenei mataupu, ua faatulaga ai lea Lipoti mo le talanoaina i le avanoa lenei o le faagasolo o a tatou Taulumaga.

Peitai, ona o lea faatoa faataatia i le taeao nei le Lipoti a le Komiti, ua ou manatu, o le a tuu atu lenei avanoa e silasila ai sui usufono mamalu i le Lipoti ma tapena ai o outou finagalo mo taeao, ona amata felafolafoai ai lea i totonu o le tatou Maota. O le faasilasilaga lena mo le tatou Lipoti lea a le tatou Komiti, ae ua i ai le manatu o le Nofoa, o le a tatou fai sina malologa mo lenei aso, taupule soifua lo outou soifua i le aso a taeao.

Ou te tapa ma le agaga faaaloalo lau Afioga i le Sui Fofoga Fetalai mo se tatalo e faaiu ai le tatou Fono.

*Na tolopo Taulumaga a le Fono Aoa Faitulafono i le itula e 10:34 i le taeao seia aulia le Aso Lulu, 25 Oketopa 2023 i le itula e 9:30 i le taeao.*